

■ COLUMNA

Stgargiada

DAD AITA DERMONT-STUPAN*

Jau ma bit giu plat sin il palantschieu da schember en stiva. Stancla caputta, ma satisfatga da la lavur. – Tgi giascha sin il fund? Va toch sin canapé, sche ti es stancla. E palantschieus n'èn betg da schember, pli tost da laresch.

Il palantschieu è propi da schember e gist perquai giaschel jau gugent sin il fund. Da tutgar es el sco vali. I fa bain da sentir mi'ossa, da respirar l'odur da rascha, da laschar cular il squitsch or da las avainas. Il suleagl dat sin mai en da l'isch da lautga e tanscha fin entamez stiva. Segn ch'el saja bass al tschiel. Segn ch'el tramuntia bainbaud. Segn che la stad saja a fin.

La stad svanescha plau-net or da mes eglis e perda pli e pli ses verd. Daventa transparenta. Ils munts daventan cotschens e mellens sco il fiu. Jau ma ves gironde sin la pastgira



che brischa, e quai a pe niv. Nagin muvel d'enturn. Dals vegls schembers e lareschs restan be ils gross mutagls sfratgads per terra u setgs guliv si, sco spierts che ans vulan avair davent u che fan beffas da nus.

Curius che jau na tschif betg fiu, che jau pass tras il fiu sco sch'i na fiss nagut. En maun hai jau ina sadella per ir a cleger izuns. Ma ils izuns lieuan en mes mauns. Il suc cula sco sang tranter la detta ora.

Uaveva jau da mulscher las chauras? –Ve Sila, ve. Qua curran ellas sut ils lareschs ora e giu en stalla. Ils lareschs glischan ussa en

ils ultims razs suleagl. A, i n'era per cletg tuttina betg fiu. Jau mulsch las chauras. Dentant il latg è cotschen rosa. Na, quel na pudain nus betg baiver. Jau srent puspè las chauras. – Giai engiu, giai a val, hop. Igl è finì.

Il muvel parta er gia als rabats da la via giu. Fashain prescha! I na po betg esser ch'il muvel arriva giu en il vitg senza passtras. E nus stuain anc zavrar las bestgas dals differents purs per las chargiar en il camiun. Nus currin. Quella là va zoppa. Las emprimas vatgas arrivan gia giu en il vitg, ornadas cun puschels e flurs. Quants aspectatur! Avavan nus fatg quels puschels e mess si plumpas talmain grondas a las vatgas? Jau betg. Ti er betg. Na. Èn quai insumma nossas vatgas? Avain nus tuttas?

***Aita Dermont-Stupan da Sent è stada u è anc adina magistra, translatura, redactura, mamma e tatta, columnist - ed ella è stada er questa stad ad alp.**